

入銅火獄恃威凌物者死入炎鐵獄殺生淫  
祀者死入佛山獄燒野山林遊獵者死入分  
形獄評論師長者死入磨山獄貪惜財物者  
死入餓鬼獄言人陰事者死入黑水獄  
要修科儀戒律鈔卷之七

要修科儀戒律鈔卷之八

唐八

三洞道士 朱 法滿 編

齋名鈔

夫入靜登真要資齋戒假其形外之法以暢  
心內之儀度人經云天地運終亦當修齋行

香誦經星宿錯度日月失昏亦當修齋行香  
誦經四時失度陰陽不調亦當修齋行香誦  
經國主有災兵革四興亦當修齋行香誦經  
疫毒流行兆民死傷亦當修齋行香誦經師  
友命過亦當修齋行香誦經夫齋戒誦經功  
德甚重上消天災保鎮帝王下攘毒害以度  
兆民生死受賴其福難勝聖紀經云齋有六  
種第一上清齋有二法一者絕羣獨晏靜氣  
遺形二者清壇肅侶依太真儀格先拔九玄  
次及家門後及己身第二靈寶齋有六法一  
曰金籙齋救度國王二曰黃籙齋拔度祖世  
三日明真齋懺悔九幽四曰三元齋首謝犯  
科五曰八節齋懺洗宿新之過六曰自然齋  
為百姓祈福第三洞神齋精簡為上絕塵期  
靈第四太一齋以恭肅為首第五青教齋以

清素為首第六塗炭齋以勤苦為功以此諸  
齋自古至今儀格甚重時移代異不無詳  
略於靈寶齋中或為半景半景之齋即是宿  
啓宿啓齋無言功唯只一時兩時懺悔亦不  
三時上香既闕步虛亦略禮經一節或小小  
齋中三歎願隨時去取逐便製儀既非大集  
心連而已

齋月鈔

三元品戒云正月天官檢校之月七月地官  
檢校之月十月水官檢校之月此三月並可  
長齋度人經云正月長齋為上世亡者七月  
長齋以為己身十月長齋安鎮國祚  
明真科曰正月三月五月七月九月十一月  
一年六齋月首教經云此六齋月上三天令  
天帝太一使者司察天下人過失此日能齋  
令除十苦拜謁太上上清八道祕言經云正  
月三月四月六月七月八月九月十月十一  
月此九月九真齋月

齋日鈔

玄都大獻經曰正月十五日天官校戒上元

齋日七月十五日地官校戒中元齋日十月十五日水官校戒下元齋日此三日能齋三官勲名善簿皇人本行經云月中三齋一日十五日二十九日乃可清齋上清飛玄經曰西王母常以正月二月四月六月七月八月九月十一月十二月一年十月月三日五日九日十五日二十五日一月五日清齋攝心元始錫禪西元九靈上真仙母給九色鳳衣鳳雲之馬神鳳紫輪飛行羽蓋二十四乘令百姓子男女人至此日能清齋誦念隨心獲果去三千之重罪契九天而受福聖紀經云正月七日名舉遷賞會七月七日名慶生中會十月五日名建生大會右三會之日三官考覈功過依日齋戒呈章賞會以祈景福又云五臘日正月一日名天臘五月初五日名地臘七月七日名道德臘十月一日名民歲臘十二月節日名王侯臘五臘通三元名八解日皆可設淨供建齋求福兼祀先亡名爲孝子得福無量餘日名爲淫祀有罪明真科曰月一日八日十四日十五日十八

日二十三日二十四日二十八日二十九日三十日名爲十直齋旨教經曰一日北斗下八日北斗司殺鬼下十四日太一使者下十五日天帝下天帝下者日月星宿諸官俱下十八日天一下二十三日太一八神使者下二十四日北辰下二十八日下太一下二十九日中太一下三十日上太一下太一下者日月五星二十八宿珠璣玉衡七星北斗司命司錄司罰司殺大聖尊神妙行真人天帝大王俱下當此之日天神地祇莫不傾悚周行天下同人善惡其日有執心精進不違經教親敬守戒誦經行道遠宣法教太一歡喜益其美祿度著左契刻名玉籙拜爲真人其日若殺生詐欺淫盜罵辱道士毀經教太一大怒減其美祿度著右契下名三官稱爲罪人若甲子日太一遣中臺天使下八節日太一八神下此日並攝齋太一歡悅庚申日身中伏尸上言人罪過本命日受法之身吏兵上天討人功失並須攝齋三皇內文曰甲子日天皇直官下以夜半時甲戌日天皇直

官下以黃昏時甲申日地皇直官下以脯時甲午日地皇直官下以日中時甲辰日人皇直官下以食時甲寅日人皇直官下以平旦時右天官下直五嶽四瀆之神各依方位位料察善惡言功記過無不上聞光當以其日修齋定籙南昌丁卯日天皇直官下以日出時丁丑日天皇直官下以雞鳴時丁酉日地皇直官下以日入時丁亥日地皇直官下以人定時丁未日人皇直官下以日昃時丁巳日人皇直官下以禺中時右六丁日是三皇之陰神日也依日持齋五嶽真人各遣五神管衛記名仙籙也

齋時鈔

千真科曰齋時先步圭取影天陰日以水刻分時皇人本行經曰齋依時不依時法先豎尺圭圭上爲尺寸於中庭依二十四氣取圭影之長短以爲法焉立春後影長六尺五寸以爲時五尺六寸爲非時雨水後影長六尺以爲時五尺二寸爲非時驚蟄後影長五尺五寸以爲時四尺七寸爲非時春分後影長

五尺以為時四尺二寸為非時清明後影長四尺五寸以為時三尺七寸為非時穀雨後影長四尺以為時三尺三寸為非時立夏後影長三尺五寸以為時二尺七寸為非時小滿後影長三尺以為時二尺二寸為非時芒

種後影長二尺五寸以為時一尺七寸為非時夏至後影長二尺以為時一尺二寸為非時小暑後影長二尺五寸以為時一尺七寸為非時大暑後影長三尺以為時二尺二寸為非時立秋後影長三尺五寸以為時二尺七寸為非時處暑後影長四尺以為時三尺二寸為非時白露後影長四尺五寸以為時三尺七寸為非時秋分後影長五尺以為時四尺二寸為非時寒露後影長五尺五寸以為時四尺七寸為非時霜降後影長六尺以為時五尺二寸為非時立冬後影長六尺五寸以為時五尺七寸為非時小雪後影長七尺以為時六尺二寸為非時大雪後影長七尺五寸以為時六尺七寸為非時冬至後影長八尺以為時七尺二寸為非時小寒後影

長七尺五寸以為時六尺七寸為非時大寒後影長七尺以為時六尺二寸為非時皇人曰諸善男女持齋不失節度童子記名天官簿中若犯戒失度為地官所考罰

法師鈔

玄都律云夫齋者正以清虛為體恬靜為業謙卑為本恭敬為事戰戰兢兢如履冰谷肅肅慄慄如對嚴君至經句處起禮拜當一心稱善隨意願念唯令丹苦必蒙感應今以建齋之家非不用意應赴之者多不存法特由大德我慢使下訛息鈔集此律略示恭勤自然訣下曰夫感天地致羣神通仙道洞至具解積世罪滅凶咎却怨家修盛德治疾病濟一切物莫近乎齋金籙簡文曰登齋嘗舉高德法師一人講一人監齋一人侍經一人侍香一人侍燈一人明日行道各典所署師一人廣須宣令  
太真科曰若就齋戒儀軌大德之人應當前行前坐約語徒眾必使齊整勿使主人有所嫌鄙或各爭異論無有畏忌非唯道俗賢善

同忌亦乃十方大聖冥鑒為罪招殃各自已受

太真科曰作齋之家請清廉道士惠無多耳請人不限於數今不篤信者聞之生於歸敬自積福德非齋不濟然清虛之人實堪歸敬貪淫之輩人我甚高就請應物恒希先肯設所簡選曾不責躬為建福家作大惠當能自退省是稱道子金籙簡文曰建齋之家未至一宿當自沐浴灑掃內外丁勅大小齋等一心  
太真科曰齋官宿到悉者湯沐浴畢俱入法堂宣示科戒或儀序有違  
一刑律論科曰不從法師各私用意  
二刑論科曰不及宿啓不得入齋今時之人明朝尚闕行道今夜宿啓豈為存懷或貪求外緣或房中睡卧分簡受職即有闕如明日行香乃生推注當由法師夜不宜告臨事沸亂喧爭一則冥府書怨二則文連法事三則不生敬信四則福善無憑論云為不善於顯明之中者人得而誅之為不善於幽闇之中

者鬼得而誅之明乎人明乎鬼然後能獨行  
老君云天網恢恢疎而不失既當主人禮供  
豈得坐致愆殃幸各思之今從已悟  
太真科曰齋官具受宣告不得與外人交言  
二刑論科曰齋日清靜存神念道標門斷客  
內外禁隔  
千真科曰建齋之家未至三日灑掃內外於  
門首豎一長幡標門使人客知之董幸之侶  
不敢至家敬信之人來乃恭肅

都講鈔

夫行齋引衆唱說為先知去就之儀定早晚  
之節敦齋威儀曰都講其職也克明正典詮  
舉職任至如行道時節禮誦容止先鳴法鼓  
次引朋衆法則執儀敬憑唱說夫以建齋行  
事都講要用明能一則參詳法師二則知主  
人齋意三則先定時節四則擊鼓鳴鐘若參  
詳法師者先取法師進止可不進退要共詳  
論不得自出一意專制法徒若知主人齋意  
者若主人吉樂齋威儀悅衆若主人疾危齋  
勤苦為務先定三時六時行道之數金鐘簡

文云朝中日入人定夜半雞鳴為六時行道  
若三時者朝中人定而已

太真科曰凡為人告齋皆三時下息若教急  
謝罪消災請福皆晝夜誦誦祝願不得卧息  
若積日疲困分時下息讀經說戒晝夜不輟  
行道齋同不得虧闕若齋官病則啓告衆則  
退出齋室齋所嚴肅不得養病養病別房勿  
喧齋所若幸堪在齋堂整肅不得低睡密  
相督勵不須行罰行罰參差幸祈感之至平  
常修習用黜罰之科使內外齊同令改昏見  
曉睡不得濫罰弟子弟子受罰不得有辭所  
罰必諤許有薄許違心而已不得苦言苦言  
怨己師與弟子同五行論若三時行道當中  
後下息至脯時夜半下息至雞鳴餘皆上講  
誦經若六時行道當中後下息至脯時黃昏  
後下息至人定夜半後下息至雞鳴三時下  
息餘時皆上講誦經使心目同注意念玄虛  
舉動施為每依儀典若擊鼓鳴鐘招仙集聖  
法鼓有二一則叩齒二則金鐘玉磬一則叩  
齒者威儀云先鳴法鼓次引朋衆然鳴法鼓

或三通七通九通十通十二通二十四通三  
十六通四十九通七十二通八十一通隨時  
所用老君經序云叩齒三咽液三也昇玄經  
云即便叩齒七通為七曜道明當發故生神  
章云叩齒九通昇玄又云叩齒十二通三嗟  
又云叩齒二十四通度人經云叩齒三十二  
通上閻三十二天昇玄經云天師西向叩齒  
七十四九通太上東向叩齒七十二通又  
云太上叩齒九九八十一通上清八通祕言  
經曰叩齒之法左左相叩名曰折制天鐘右  
右相叩名曰震推天磬中央上下對相叩名  
曰嚴鳴天鼓若卒遇凶惡不祥當折天鐘三  
十六通若經凶辟邪威神大祝當推天磬若  
存思念道致真招靈當鳴天鼓叩齒雖一其  
實有三故凶惡而畏天鐘之響山神而攝天  
磬之洞招神而肅天鼓之震矣宮商有節希  
微內感不可以一槩而求不可以偶然而合  
召也靈都記云鮑助濟北人年四十餘亦無  
道術中風至口面齒常自啄年得一百二十  
七後遇大水隨長壽河而死北帝數遣殺鬼

取之鬼不敢近鬼官問其故殺鬼答云此人乃多方術以制於我常行叩齒鳴打天鼓以警身神神不得散鬼氣不得入也二則鐘磬者

太真科曰齋堂之前經臺之上皆懸金鐘玉磬鐘磬依時鳴行道講悉先叩擊非唯警戒人眾亦乃感動羣靈神人相聞同時集會弘道濟物盛德交歸又曰法身叩鐘清嚴束帶諦心存神與已相見調槌正擊漸微至著

數十二二十四三十六隨眾多少皇人本行經曰鳴鐘正法服先至鐘所手執鐘槌祝曰圓槌震法鐘流聲徧十方入下通長夜登高響玉房九幽聞離苦七祖上仙堂鳴三下法

陰敷生於二成於十爪彈十下發長牙之音陽敷生於一成於九次引九槌震瓊瑤之響三下者上聞清微禹餘大赤之三天中應無

色色欲之三界下警地獄餓鬼畜生之三徒三天三界三徒三三為九故九槌也欽長法欽長二十七槌上九通九天之道君中九覺九宮之真帝下九招九幽之苦覓連三下合

四九三十六槌上聞三十六天帝中應三十六部尊經下徹三十六地戶若得法左仙童記善若失法右玉女記惡明各詳之犯科冥考玄都律曰若都講行事不唱自罰香一斤今出家之人不依節制鳴鐘信任在下師主又無執儀非但依被鞋履不端亦乃遲疾之節失度一則人聞可醜二則龜鏡失常寫圖樣以示人庶當來而可執

監齋鈔

夫道因聖顯福寄人弘若不糾彈無遵典憲敷齋威儀云篤勵厲急彈糾怒過不偏不黨無隱無溢秉執憲章務存九愜然所為法事要假其人若不切磋何取成例只可依法勿惜人情昇玄經云監齋十事一者令設供之家先齋前三日投辭於法師陳說所願并修所請齋人姓名道位多少法師受辭即對辭主騰辭上刺請監齋官屬二者令供主還家更報所請齋人云已投辭上刺訖宜各潔淨勿與俗人共同林座莫作諸惡不善之行此至齋竟保全身口意一如太上威儀之令三

者令供主不得盜鬼神之餘物及市買熟食以供齋人四者令供主見有異人聞齋欲來聽經者不得計飲食之費過截不聽五者令供主上刺訖還家便於靜室齋堂燒香明燈為監齋官屬當下監察六者供主不得辭託齋事不供當賓客七者當令供主解齋布施隨家豐儉一錢一縷亦足表心八者令供主不得緩帶裙裳如給使法九者令供主不得迎師有人去便不送是去就異心皆思忘義十者不得令供主因解齋之餘以解神福是名貪利惜費無恭肅心

女都律云主人內外不預相檢勅音聲高厲者罰油五升若主供辦諸物有闕罰油二升若執糾見過不彈私隱罰油六升若受闕不啓上補罰油三升若齋人妄言綺語論及私

鄙罰香一斤油五升朱三兩律曰若有犯威儀彈糾不伏者當啓告三寶退出齋次若彈糾不實以罪罪之若上座法師自覺有失須收愆送失如不自收監齋准法彈糾若法事有虧從一至三監齋依事罰

糾若從三以上斷功削除宣示同學不得容  
在法座若監齋客縱不糾亦與同罪

侍香鈔

夫水以洗塵香能破穢假茲百和託信三清  
敷齋威儀云侍香其職也矣謹肅整芳馨恒

然使畢夜煙流終朝火續此法事之所先宜  
晨昏而勿怠本際經云散天香花猶如室下

續紛芳馥悅樂衆心又云墳百和反風名香  
散萬種天樹寶花衆篇經云飛香八溟流電

揚峰又云金童揚香月宮散花定志云百和  
寶香不墳自薰昇玄經云香氣芬芬薰於八

方五符序云然百和之香以破穢又云燒香  
照五帝看流芳所歸氣正上中央黃帝先降

氣東流者青帝先降氣南流者赤帝先降氣  
西流者白帝先降氣北流者黑帝先降

玄都律曰誥朝拜竟其日燒香災殃自滅違  
律罰筭一紀

玄都律云若翻覆香火罰香二斤若侍香煙  
中絕罰油四斤若臨燒香突行罰油二斤若

行者不洗手漱口罰油二斤登真隱訣曰香

者天真用茲以通感地祇緣斯以達言是以  
祈念存注必燒之於左右特以此煙能照玄  
達意亦有侍衛之者宜讀辭誠故也又云建  
城縣及高陵並有然石一燒令赤便永不糜  
耗得一丸以燒香實為省要

侍燈鈔

夫就齋入靜燈燭居先朗耀八門光輝九夜  
續明之功既舉長更之福可修敷齋威儀云

侍燈其職也蘭缸晚映係明西日灼燁壇場  
照灼清夜若遇雨權停值風暫息賓主參詳

與特興慶幸勿抑斷用虧成典登真隱訣曰  
真人擬日暉以通照後月精以朗幽

四極明科曰立春春分之日然九燈於中庭  
立夏夏至然三燈立秋秋分然七燈立冬冬

至然五燈本命之日然十二燈夜半露出燈  
下春則向東夏則向南秋則向西冬則向北

本命則向太歲中齒二十四通祝曰  
高上太真萬聖帝皇五帝玉司總仙監真今

日吉良八節開陳陽絕陰考絕滅九陰於今  
永始拔禪七玄免脫火鄉永離刀山三塗五

若不累我身得同天地長保帝晨五願八會  
靡不如言畢解中叩頭百二十過當額向地  
而叩竟復巾仰天心念我身今日上享天恩  
賜久形霞受生飛仙因仰咽二十四氣止如  
此三年宿怨並除身與真同不復五苦脫過

火鄉尅得真人遊宴玉房可謂妙訣慎勿輕  
宣金蘇簡文曰披度生死建齋於中庭土壇

縱廣上壇二丈四尺下三丈二尺開四面四  
角上下十門門廣五尺闌纂標勝法天象地

壇中央安一長燈令長九尺上然九燈每令  
光明上照九天下照九幽於門外四面各安

九燈合三十六燈以圍壇金蘇簡文云入堂  
靜明燈訖向燈三拜呪曰

正一陽光焰上朱煙開光童子一十二人洞  
照一宅及得我身百邪摧落殺鬼萬千光明

朗徹通真達靈昇入無形與道自然畢退出  
堂滅燈呪曰

玄陰閉光長燈續明太陽已朗八威開清燈  
通太陰光附景生日月二真與我合併便滅

火本命上然燈以照七鬼行年上然燈以照

三處太歲上然燈以照一身大墓上然燈以照朽骸小墓上然燈以照太陰堂前然七燈以照七世中庭然九燈以照九幽伏門然二燈以照宮宅地戶然二十四燈以照二十四生氣八方然八燈以照八卦中央然九燈以照九宮天門然十燈以照十方然二十八燈以照二十八宿然三十二燈以照三十二天然五燈以照五嶽金籙簡文曰然燈威儀功德至重上照諸天下明諸地八方九夜並見光明侍燈之官勤為用意每令燈光竟夕明

○  
真齋儀曰於中庭然九燈於竿上以照九幽壇四面各然九燈合三十六燈露經中庭巡繞九幽燈燒香行道禮懺也黃籙簡文曰然九十神燈

明真科曰若有災急可丹書五篇真文於中庭五方安又上金五兩什五龍以鎮五篇五色紋繒之信以鎮五帝春則然九燈亦可九十燈亦可九百燈夏則然三燈亦可三十燈亦可三百燈秋則然七燈亦可七十燈亦可七百燈冬則然五燈亦可五十燈亦可五百

燈四季之月則然十二燈亦可百二十燈亦可千二百燈中央安一長竿上然九燈

玄都律曰若侍燈火中滅罰香一斤若翻燈燭罰油五升

要修科儀戒律鈔卷之八



要修科儀戒律鈔卷之九 唐九

衣服鈔

三洞道士朱法滿編

夫超出塵累依庇法域晨夕勤修離邪歸正以禦法服乃可朝真穢黷褻裳如何謁聖然褐是日月之象被為氣數之衣出入行來須貴敬一人有失能敗法徒總以澆訛從何取則今時之輩或以淨衣穢慢或以法服借人或坐地而染塵泥或藉牀而當氈席使神靈而靡衛令道俗以驚嗟巾帽不整尚累於傍人實衣猿狙以周公之服者矣

○  
千真科曰道眾威儀事在嚴整衣服清潔執行可觀則生世善心諸天稱歎若形儀慢顯不喜衆心不堪就請毀辱道法即是道寶有虧斷大慈種若為衆儀執人所歛慕即是道寶光顯法門有寄

○  
科曰通服中華長裙大袖與俗有別不得與白衣參服袍裘皮靴角柄食器皆須漆素而已不繫金銀銅器若朝修行事禮謁衆聖皆威儀法服隨法位次若上清衣紫靈寶通黃